



01. marts 2024

UPA2024/75

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Namminersorneq pillugu Inatsimmi § 21-p atuutsilersinnejarnissa siunertaralugu ataatsimiititaliamik pilersitsisoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Kuno Fencker, Siumut)

Apriilimi 2023 Inatsit Tunngaviusussaq pillugu Isumalioqatigiissitaq Kalaallit Nunaata tunngaviusumik inatsisissaattut missingiussaminik naammassisqaqarpoq. Kingorna ukiakkut 2023 Inatsisartut Naalakkersuisut pisinnaatippaat, tunngaviusumik inatsisissaq pillugu isumaliutissiissut paasititsiniutigalugu sulineq ingerlateqqissagaat.

Namminersorneq pillugu Inatsit ilusilersugaasimanermigut siunertaraa, inuaat Kalaallit pisinnaatitaaffeqartut aalajangissallugu, Danmarkimut attaveqarneq pillugu isumaqtiginninniarnissamut qanoq ittumik pisinnaatillugit Naalakkersuisut aallartitsissanersut. Namminersorneq pillugu Inatsimmi § 21-p oqaaseqataanni ilaatigut ima allaqqasoqarpoq

*(Nammineq nutsigaq): "Namminersorlutik Oqartussat qaqqugukkulluunniit tunngaviusumik inatsisissamut suliaqarlutik aallartissinnaapput. Taamaappat Kalaallit Nunaat Namminersorneq pillugu Inatsisip iluani nammineerluni naalagaaffinngornissamut piareersaateqarsinnaavoq. Kalaallit Nunaata naalagaaffinngornissamut nalilersugaannut ilaatigut ilaasinnaapput Danmarki peqatigalugu aaqqissuussinerit (Naalagaaffiit Peqatigiikkumasut) kiffaanngissuseqarluni suleqatigiiffiusut."*<sup>1</sup>

Taamaattumik Namminersorneq pillugu Inatsimmut pissusissamisoortumik inissisimaffiuvoq, Inatsisartut inuiannut Kalaallinut sinniisutut Naalakkersuisut pisinnaatippassuk isumaqtiginninniarnissamik aallartitseqqullugit, taannalu uani siunnersuummi pineqarpoq.

Siumup anguniagaraa Kalaallit Nunaat naalagaaffinngussasoq. Naalagaaffinngorneq Siumumut ima isumaqarpoq, nunarsuarmioqativut suleqatigissagivut aamma akisussaaffiit tamarmik innuttaasunut Kalaallit Nunaannullu pingaaruteqartut tamakkiisumik politikkut

<sup>1</sup> <https://www.retsinformation.dk/eli/ft/200812L00128>



kiffanngissuseqarluni akisussaaffeqarlunilu tiguneqassasut. Taamaattumik Kalaallit Nunaanni innuttaasut peqatigiillutik nunaminnik oqartussaanerpaangornissaminut tigusinissaasa taassisutigineqarsinnaanera pillugu piareersaasioqatigiittariaqvippu. Tamanna pisariaqassappat Naalagaaffiup oqartussaasuinik isumaqatigiinniartoqareernerata kingorna erseqqissarneqarsinnaavoq, illuatungeriillu tamarmik Kalaallit Nunaata Danmarkillu akornanni suleqatigiinnissamut toqqammavissamik pilersitsissapput, tamannali isumaqatiginninniartut akornanni tunngavilikkanut inuiaqatigiinnilu innuttaasunik taasitsinermik tunngaveqassaaq.

Siumup anguniarpaa politikkut tamakkiisumik oqartussaalernissaq namminiussuseqalernissarlu, tamakkiisumik ilaannakortumilluunniit nunanut allanut akisussaaffinnik avitseqatigiissinnaaneq ammatillugu. Politikkut aaqqiagiinnginnerit pinngitsoortinniarlugit suleqatigiinnissat taamaattut peqqissaartumik aaqqissuunneqassapput aamma qulakkeerumallugu illuatungeriit tamarmik naligillutik inisisimissaat kiisalu tamakkiisumik inuiattut namminiussuseqarneq piusoq qulakkeerniarlugu.

Siumup eqqumaffigai nunani allani misilittagaalersimasut, tassaasut naalagaaffiit marluk akunnerminni nunasiaateqartuusimasutut nunasiaataasimasutullu inisisimasut suleqatigiikkaangata. Tassunga tunngatillugu ataatsimiititaliap sulinerminni anguniartariaqarpaa, ullutsinnut naleqquttumik, oqartussaafflersuisumik nutaliortumillu aaqqissuussinissaq orniginassammat, soorlu "Naalagaaffiit Peqatigiikkumasut", "commonwealth" allatulluunniit naalagaaffittut Danmarkimut suleqateqarsinnaaneq, tamannalu isumaqatiginninniarnerni isummerfigineqarpat, nunanut marlunnut inuinullu aaqqissuussinerussasoq pitsaasoq.

Danskit tunngaviusumik inatsisaata akueraa Danmarki tassaasoq naalagaaffik ataasisusoq, tamannalu kingorna Kalaallit Nunaata nunat tamalaat akornanni suleqatigiiffinnut peqataasinnaaneranut killilersuisutut malunniuttarpoq. Taamaakkami una aalajangiiffigisassatut siunnersuut naqissusiivoq, Kalaallit Nunaat nammineerluni nunat tamalaat suleqatigiiffiinut peqataanissanut aalajangersaasassasoq, soorlu NEAFC, NAFO, NATO, Naalagaaffiit Peqatigiit aamma Issittumi Siunnersuisooqatigiit, suleqatigiinnerlu Danmarkip imminut pisinnaatitaafflersorsimaneranut pituttorsimassanngitsoq.

Siumup ilisimavaa akisussaaffiit tamaasa ullormiit ullormut tigussallugit unamminartuussasoq. Ilutigisaanik partiip ilisimavaa, politikkut namminiussuseqarnissamik kissaateqarnerup piviusunngortinnissaanut tigusassanut politikkullu aqutsinissamut pilersaaruteqarnissaq pisariaqartoq. Taamaattumik politikkut namminiussuseqarnissaq aamma naligiilluni kiffaanngissuseqarlunilu ingerlanissaq angujumallugu, ataatsimiititaliami sulinermi eqqumaffigineqartussat ilagisariaqarpaat oqartussaaqataanitta qulakkeernissaa, inatsisit tunngavigalugit ingerlatsinita innarlerneqannginnissaa, nammineq aalajangersaasinnaanitta qulakkeernissaa aamma aningaasarsiornikkut periusissiorsimasariaqartugut.

Piffissami uani Siumup anguniarpaa, nammineq aalajangiinissamut pisinnaatitaaneq inuiassuit akornanni maleruagassat naapertorlugit ingerlanneqassasoq. Ataatsimiititaliap anguniassavaa



naalagaaffeqariaaseq qanoq ittoq Kalaallit Nunaata naalagaaffittut atisalersuutigissaneraa, aamma Danmarkip pisariaqassappat isumaqatiginninniarfigereernerata kingorna. Taamaattumik siunertaavoq nanissallugu, uagut soqutigisavut salliutinniarlugit naalagaaffeqatigeeriaaseq qanoq ittoq sunaassusersisimanissaa, aamma politikkut namminiusseqarneq pillugu taamalu nunarsuarmioqatigiinnut tamakkiisumik Kalaallit Nunaata peqataalernissaa periarfissiissutigissallugu, tamatumalu kingunerisaanik aningaasarsiornikkut ineriertornissamullu periarfissiissuteqartoqaqqullugu.

Siumumut pingaarpooq Kalaallit Nunaata kiffaanngissuseqarluni nunarsuarmioqatigiit akornanni peqataalernissaa, aamma inuaat Kalaallit namminerisaminnik inuaassuseqassasut naalagaaffimminnilu innuttaassuseqassasut ilutigisaanillu nunat inoqqaavisut inisisimasut akuerineqassasut.

Suliniarnerit taamaattut aallartinniarlugit siunnersuutigineqarpoq ataatsimiitaliorqassasoq, taakkulu Kalaallit Nunaata, inuaat Kalaallit aamma Inuit soqutigisaat suliarissagaat. Ataatsimiitaliornissaq siunertaralugu Naalakkersuisut peqquneqassapput isumalluutissanik pisariaqartunik immikkoortitseqqullugit, aamma pisariaqassappat Naalagaaffik suleqatigalugu. Ataatsimiitaliap suliai tigussaasumik naalagaaffinngornissaq siunertaralugu innuttaasunik taasisitsinissamut tunngaviliissapput.

Aatsaat naalagaaffinngornissaq pillugu isumaqatiginninniarnerit piareerpata aamma innuttaasunik taasisitsineq naammassineqarpat, Kalaallit Nunaata tunngaviusumik inatsisissaa naammassineqaruni pitsaanerussaaq, tassami isumaqatiginninniarnermi angusat naalagaaffeqariaaseq qanoq ittuunissaanut sunniuteqartussaassammata.

### **Pisortanut aningaasatigut allaffissornikkullu kingunerisassai:**

Siunnersuummi pineqarpoq ataatsimiitaliaq pilersinniarlugu Naalakkersuisut piareersaateqarlutik aallartissasut aamma suliassat allattorsimaffiat ilanngullugu. Selineq taanna ukiariaata tungaanut ingerlasussatut naatsorsuutigineqarnarmat, piffissangorpat aningaasat atorneqartussat naniniarlugit Aningaasanut Inatsimmut 2025-imiit atuuttussamut Siumut suleqataasaaq, taamaasilluni ataatsimiitaliap suliassani pisortatigoortumik januaarip aallaqqaataani 2025 aallartissinnaaniassammagit.

Taamaakkami massakkuugallartoq uppermassuseqakannersumik suliassap qanoq akeqassanera tikkuaruminaappoq.

### **Namminersortunut aningaasatigut allaffissornikkullu kingunerisassai:**

Soqanngilaq.

### **Innuttaasunut aningaasatigut allaffissornikkullu kingunerisassai:**



Siumup ilimasuutigaa aningaasat Aningaasanut Inatsit 2025 aqqutigalugu nanineqartussat innuttaasunut sunniuteqassanngitsut.